



PEJABAT PENDAFTAR
REGISTRAR OFFICE

Rujukan Kami : UPM.100/1/5/1 (7)

Tarikh : 29 Mac 2023

**PEKELILING PERKHIDMATAN UNIVERSITI PUTRA MALAYSIA
BILANGAN 1 TAHUN 2023**

**KEMUDAHAN CUTI TANPA REKOD BAGI URUSAN KEMATIAN
AHLI KELUARGA TERDEKAT**

TUJUAN

1. Pekeliling Perkhidmatan ini bertujuan untuk Universiti Putra Malaysia menerima pakai dengan pindaan berdasarkan surat edaran Jabatan Perkhidmatan Awam (JPA) berkaitan dengan Penambahbaikan Kemudahan Cuti Tanpa Rekod Bagi Urusan Kematian Ahli Keluarga Terdekat, sepertimana pada Ceraian SR.5.2.1.

LATAR BELAKANG

2. Lembaga Pengarah Universiti telah menerima pakai Pekeliling Perkhidmatan Bilangan 4 Tahun 2015: Kemudahan Cuti Tanpa Rekod Bagi Urusan Kematian Ahli Keluarga Terdekat berkuat kuasa mulai 1 Julai 2015 di Universiti Putra Malaysia.

3. Tafsiran ahli keluarga terdekat melalui Pekeliling Perkhidmatan Bilangan 4 Tahun 2015 adalah suami, isteri, ibu kandung atau ibu angkat, bapa kandung atau bapa angkat, ibu mertua, bapa mertua, anak kandung, anak angkat yang sah di sisi undang-undang, anak angkat de facto dan anak pelihara.

4. Selaras dengan pengumuman inisiatif baharu oleh YAB Perdana Menteri semasa Majlis Amanat Perdana Perkhidmatan Awam ke-18 (MAPP XVIII) pada 30 Ogos 2022, Kerajaan bersetuju supaya peluasan tafsiran ahli keluarga terdekat di dalam Pekeliling Perkhidmatan Bilangan 4 Tahun 2015 ditambah baik.

5. JPA kemudiannya telah membuat penambahbaikan terhadap pekeliling tersebut melalui Pekeliling Perkhidmatan Sumber Manusia (MyPPSM) Ceraian SR.5.2.1. Kemudahan Cuti Tanpa Rekod Bagi Urusan Kematian Ahli Keluarga Terdekat yang memperuntukkan kemudahan kepada pegawai perkhidmatan awam bagi menziarahi jenazah dan membantu urusan berkaitan kematian ahli keluarga terdekat.

6. Peluasan tafsiran ahli keluarga terdekat kini ditambah baik merangkumi adik-beradik, nenek dan datuk pegawai.

TARIKH KUAT KUASA

7. Penambahbaikan peraturan ini dilaksanakan melalui Ceraian SR.5.2.1(UPM) Kemudahan Cuti Tanpa Rekod Bagi Urusan Kematian Ahli Keluarga Terdekat berkuat kuasa mulai 5 September 2022

PEMAKAIAN

8. Lembaga Pengarah Universiti ke-169 bertarikh 7 Mac 2023 melalui Minit 169/10 bersetuju meluluskan Universiti Putra Malaysia menerima pakai dengan pindaan Pekeliling Perkhidmatan Sumber Manusia (MyPPSM) Ceraian SR.5.2.1. Kemudahan Cuti Tanpa Rekod Bagi Urusan Kematian Ahli Keluarga Terdekat sebagai Pekeliling Perkhidmatan Universiti Putra Malaysia Ceraian SR.5.2.1(UPM).

“MALAYSIA MADANI”

“BERILMU BERBAKTI”

Saya yang menjalankan amanah,



(MUHAZAM BIN MANSOR)

Pendaftar

Universiti Putra Malaysia

**KEMUDAHAN CUTI TANPA REKOD BAGI URUSAN KEMATIAN AHLI
KELUARGA TERDEKAT**

TUJUAN

1. Ceraian ini bertujuan untuk melaksanakan keputusan Kerajaan berkaitan kemudahan Cuti Tanpa Rekod Bagi Urusan Kematian Ahli Keluarga Terdekat kepada pegawai Universiti Putra Malaysia (UPM).

LATAR BELAKANG

2. Kemudahan Cuti Tanpa Rekod bagi urusan kematian ahli keluarga terdekat diperuntukkan untuk menziarahi jenazah dan membantu urusan berkaitan dengan ahli keluarga terdekat. Kemudahan cuti tanpa rekod ini diperuntukkan kepada pegawai UPM melalui Pekeliling Perkhidmatan Bilangan 4 Tahun 2015: Kemudahan Cuti Tanpa Rekod Bagi Urusan Kematian Ahli Keluarga Terdekat.

TAFSIRAN

3. Dalam Ceraian ini, melainkan jika konteksnya menghendaki makna yang lain:

'ahli keluarga terdekat' bermaksud suami, isteri, ibu kandung atau ibu angkat¹, bapa kandung atau bapa angkat², ibu mentua, bapa mentua, anak kandung, anak angkat yang sah di sisi undang-undang, anak angkat *de facto* dan anak pelihara adik-beradik, nenek dan datuk kepada pegawai.

'anak angkat' bermaksud seseorang anak yang telah dibenarkan oleh Mahkamah untuk diangkat atau diangkat semula³.

'anak angkat *de facto*' bermaksud seseorang kanak-kanak itu berada dalam jagaan, sedang dibesarkan, ditanggung dan dididik oleh pegawai sebagai anaknya di bawah sesuatu pengangkatan *de facto*, dan bagi suatu tempoh tidak kurang daripada dua (2) tahun yang berterusan dan sebelum sahaja dari tarikh permohonan tersebut di bawah seksyen 6, Akta Pendaftaran Pengangkatan 1952 [Akta 253].

¹ Ibu angkat yang sah di sisi undang-undang

² Bapa angkat yang sah di sisi undang-undang

³ Sebagaimana yang ditafsirkan dibawah seksyen 2 Akta Pengangkatan 1952 [Akta 257]

'**anak pelihara**' bermaksud seseorang kanak-kanak yang diberi pemeliharaan, jagaan dan kawalan kepada ibu bapa peliharaan di bawah perenggan 30(1)(e) Akta Kanak-kanak 2001 [Akta 611].

'**bapa angkat**' bermaksud bapa kepada anak angkat seperti diperuntukkan di bawah Akta 257.

'**bapa mentua**' bermaksud bapa kepada isteri atau suami yang sah.

'**ibu angkat**' bermaksud ibu kepada anak angkat seperti yang diperuntukkan di bawah Akta 257.

'**ibu mentua**' bermaksud ibu kepada isteri atau suami yang sah.

'**adik-beradik**' bermaksud beberapa orang yang mempunyai hubungan kekeluargaan kerana seayah dan seibu, atau seayah atau seibu.

'**nenek**' bermaksud ibu kandung kepada ibu kandung atau bapa kandung pegawai. 'datuk' bermaksud bapa kandung kepada ibu kandung atau bapa kandung pegawai.

'**Ketua Jabatan**' bermaksud seseorang pegawai yang bertanggungjawab bagi sesuatu kementerian, jabatan, institusi atau agensi dan termasuklah mana-mana pegawai yang diberi kuasa untuk meluluskan Cuti Rehat bagi kementerian, jabatan, institusi atau agensi.

'**perkhidmatan Kerajaan**' bermaksud Perkhidmatan Awam Persekutuan, Perkhidmatan Awam Negeri, Pihak Berkuasa Berkanun (Persekutuan dan Negeri) dan Pihak Berkuasa Tempatan.

PELAKSANAAN

4. Kemudahan Cuti Tanpa Rekod bagi urusan kematian ahli keluarga terdekat hendaklah dilaksanakan seperti yang berikut:

- (i) kemudahan ini diberikan selama tiga (3) hari berturut-turut sebagai Cuti Tanpa Rekod kepada pegawai UPM untuk membuat apa-apa urusan pengebumian jenazah ahli keluarga terdekat itu dan untuk membantu waris-waris jenazah tersebut untuk urusan-urusan lain yang berkaitan;
- (ii) bagi maksud kemudahan yang diperuntukkan untuk urusan kematian ibu mentua atau bapa mentua, kemudahan ini adalah terhad bagi seorang ibu mentua dan seorang bapa mentua sahaja sepanjang tempoh perkhidmatan Kerajaan;

- (iii) Cuti Tanpa Rekod ini hendaklah:
- (a) bermula pada tarikh kematian ahli keluarga terdekat atau pada hari berikutnya jika ahli keluarga berkenaan meninggal dunia selepas waktu pejabat; dan
 - (b) meliputi hari rehat mingguan, hari kelepasan mingguan dan hari kelepasan am. Bagi maksud Ceraian ini, masa selepas waktu pejabat juga terpakai bagi hari rehat mingguan, hari kelepasan mingguan dan hari kelepasan am.
- (iv) kemudahan ini adalah tertakluk kepada kepentingan perkhidmatan dan Ketua Jabatan boleh memanggil balik pegawai jika ketiadaan pegawai di tempat kerja boleh memudaratkan keselamatan negara atau kepentingan awam;
- (v) permohonan Cuti Tanpa Rekod ini hendaklah dikemukakan kepada Ketua Jabatan melalui sistem eCuti berserta salinan dokumen pengesahan kematian ahli keluarga terdekat apabila pegawai kembali bertugas dan hendaklah dicatatkan dalam Buku Rekod Perkhidmatan pegawai.

PEMBATALAN

6. Dengan berkuatkuasanya Ceraian ini, Pekeliling Perkhidmatan Bilangan 4 Tahun 2015: Kemudahan Cuti Tanpa Rekod Bagi Urusan Kematian Ahli Keluarga Terdekat adalah dibatalkan.

PEMAKAIAN

7. Lembaga Pengarah Universiti Ke-169 bertarikh bertarikh 7 Mac 2023 melalui minit 169/10 menerima pakai keseluruhan Ceraian ini.



PENDAFTAR
UNIVERSITI PUTRA MALAYSIA